

**QUISTIONE A BOCCA POSTA DA SAVERIU LUCIANI E GILLES SIMEONI
A NOME DI « FEMU A CORSICA »**

OGGETTU : Custruzione d'una casa d'accolta Specializzata per l'autisti in Urtaca

A salute ferma una primura tamanta per u nostru paese. L'attualità di e simane scorse n'hà fattu una bella dimustrazione, ch'ella sia in Piaghja o sippuru in Balagna per indettu. E mubbilizzazione di e pupulazione, di i medichi è di l'eletti anu permessu di strappà mezi supplementarii. Ma si sà bè ch'elli ùn bastanu mancu à pena in parechji settori.

S'omu guarda ghjustu à puntu a filiera « Autisimu », ci rendimu contu chì u so postu in u dispositivu medicusuciale corsu ùn hè ancu à compie. A situazione chere risposte chjare è soprattutto forte.

Ch'è vo sappiate chì dipoi più di 15 anni l'associu Espoir Autisme Corse prupone à i differenti attori di a salute a messa in piazza di strutture d'accolta per persone autiste.

A i ghjorni d'oghje, secondu i dati di l'INSERM è di u CREAL Paca-Corsica , u nostru territoriu conta 399 zitelli tocchi da scunturbi invadenti di u sviluppu cù autismu è u doppiu di persone maiò, vale à dì ch'ellu ci n'hè à l'ingrossu più di 1200.

L'associu EAC hà fattu dipoi u 2004 parechje pruposte indispensevule. Cusì chì trè prugetti sò stati pigliati in contu da u CROSMS di nuvembre di u 2009 : in prima a creazione d'un « SESSAD autisme » di 20 piazze in Cismonte, da pudè curege u sbilanciu di presa in carica in u dipartimentu, a creazione d'un CRA (centru di risorse autisimu) regiunale, è perfine a custruzione d'una MAS (maison d'accueil spécialisée) in URTACA.

Di regula, sta casa d'accolta specialisata permetteria un accumpagnamentu per 30 persone maiò, cù 24 piazze d'internatu, in cunsunenza cù u pianu autisimu 2008/ 2013.

Per avà, si hè pussutu fà solu e duie prime uperazione, vale à di l'autorisazione d'apertura di u SESSAD è di u CRA da l'ARS.

U SESSAD viaghja dipoi dicembre scorsu è accompagna 20 zitelli nant'à a strada di l'integrazione suciale è sculare ghjornu per ghjornu. Inquant'à u CRA, s'hà da apre in logica in e simane à vene, è permetterà l'elaborazione d'un diagnosticu nant'à i dui poli di competenze in Aiacciu è in Bastia. Ghjuverà cusì in fatti di polu d'infurmazione per e famiglie è i prufesionali.

Da sustene ste trè primure, a CTC hà vutatu sottu à l'ultima mandatura è di ferraghju di u 2011 un'aiutu di 550.000 €, pattu è cundizione chì a maiò parte di sti soldi ghjuvessinu per costrui a casa urtacaccia.

Fattu si stà chì u Statu ferma oghje ghjornu l'attore finanziaru principale di l'uperazione. Malgradu u fattu ch'ella sia scritta à u PRIAC, simu sempre à chì feremu, senza nisun risposta ...

A cunsequenza dannefica tandu si capisce megliu: l'ingorgu di tutti i stabbilimenti d'accolta per zitelli da persone maiò beneficiarii di l'amendamentu « creton » (per u mantenimentu di persone maiò in l' IME di pettu à u pocu di piazze in i stabbilimenti adatti).

L'associu si dà di rimenu è cuntinueghja, circhendu a cullaburazione à u scopu d'efficacità di e PEP cismuntinche, da pudè avvià un gruppamentu di gestione è di cuuperazione dedicata à a filiera autistica. Listessa iniziativa si face cù à Stella in Pumonte.

Tuttu què per di ch'ellu ci vole à sustene e famiglie è i zitelli, è via via l'associu Espoir Autisme Corse per sbuccà è fà di u so prugettu una realtà in a pieve di u Canale dumane. Aspettanu una risposta chjara da u statu è un appoghju da parte nostra. Per contu vostru, site prontu à impegnavvi è à accompagnà stu prugettu di manera decisiva? Ancu s'è a nostra culletività, à turnemu à di, ùn hà a competenza, Femu à Corsica vi dumanda d'interpellà u Statu è l'ARS un'antra volta nant'à sta quistione urgente di salute publica.

À ringraziavvi